

儀

顧

堂

集

儀顧堂集卷十三

歸安陸心源撰

湖州府志人物傳文學

沈友傳

以下吳

沈友字子正吳興人善屬文有口辨每所至衆

人皆默因號曰謚

御覽四百六十三引張勃吳錄

年十一華歆

行覽風俗見而異之因呼曰沈郎可登車語乎

友逡巡卻曰君子講好會宴以禮今仁義陵遲

聖道崩壞先生銜命將以宏闡教化整齊風俗

而輕脫威儀猶負薪救火無乃更崇其熾乎歆

慙曰自桓靈以來雖多英彥未有幼童若此者  
弱冠博學無不貫綜仍喜武事注孫子兵法咸  
稱其筆舌刀爲三妙孫權以禮聘之旣至論王  
霸之略當時之務因陳宜并取荊州權納之正  
色危言風采峻厲大迂庸臣遂誣以謀反權亦  
忌其英邁謂終不爲己用一日大會僚友有所  
是非權令人扶出謂曰人言卿反友知不免乃  
曰主上在許有無君之心者可謂非反乎遂殺  
之年二十九

吳志孫權傳注引吳錄○御覽三百八十四引作吳書

姚信傳

姚信字德祐

經典釋文

一字元直吳興人吳太常卿

隋書經籍志

有名江左

陳書姚察傳

初以親附太子枉見

流徙

吳志陸遜傳

孫皓改葬明陵置太守四時奉祠

寶鼎二年營立寢堂號曰清廟十二月遣太常

信等備官僚中軍步騎二千人以靈輿法駕東

迎神於明陵

吳志孫和傳

建衡元年陸凱疾病皓遣

中書令董朝問所欲言凱陳姚信等爲社稷之

楨幹國家之良輔願陛下重留神思訪以時務

吳志陸凱傳

所撰周易注士緯新書昕天論並行世

隋書經籍志

又有誠子書

藝文類聚

閻士和傳

以下唐

閻士和字伯均居衡山與皎然爲方外交皎然嘗有舟行寄懷詩云二月湖南春草遍橫山渡口花如霰相思一日在孤舟空見歸雲三兩片

道場山下歸雲菴得名本此

談志

士和受業於蕭

頴士嘗曰士和鉤深致遠吾勿逮矣士和著蘭陵先生誄蕭夫子集論因權歷世文章而盛推

頴士所長

唐書

楊衡傳

楊衡

一作湯衡

字中師烏程人大厯進士以詩鳴仕

終大理評事

談志

衡爲人氣性岐嶷有縱橫之才

符載與王尚書書

初隱廬山有盜其文登第者衡因詣

闕亦登第見其人盛怒曰一一鶴聲飛上天在

否答曰此句知兄最惜不敢偷衡笑曰猶可恕

也

唐詩紀事

與蜀郡符載北海王簡言隴西李元象

爲友詣青城山造潯陽廬山以林壑相尚

符載送楊

衡遊南越序

號山中四友

唐詩紀事

詩文爲時輩所宗亦

稱楊符

陳舜俞廬山記

精綜六籍翺翔百氏爲江湖聞

人出廬岳歸蜀泝九江歷楚抵秭復自長安僑

寓荊州卒

符載序○案唐摭言皎然集輿地紀勝俱作湯衡

沈亞之傳

沈亞之字下賢吳興人元和十年登進士第嘗游韓愈門李賀許其詩工爲情語有窈窕之思

沈下賢文集序

涇源李彙辟書記爲祕書省正字長慶

初補灤陽尉四年爲福建都團練副使事徐晦

後累進殿中丞御史內供奉

郡齋讀書志

大和初授

柏耆德利行營諸軍計會使亞之以殿中侍御史爲判官諭旨會李德裕平德州同捷窮請降耆乃馳入滄誅同捷諸將嫉其功比奏譖詆文宗不獲已耆貶循州司戶參軍亞之補南康尉

唐詩紀事杜牧李商隱李賀俱有擬沈下賢詩亦當

時名輩所稱許云

郡齋讀書志

### 周朴傳

周朴字太朴吳興人

福州府志

與李頻方干爲詩友

朴詩思遲盈月方得一聯一句未暇全篇已膾

炙人口

林嵩周朴詩集序

朴題安吉董水嶺詩云湖州

安吉縣門與白雲齊禹力不到處河聲流向西

安吉志

有士人以朴僻於詩欲戲之遇朴在旁吟

朴詩云河聲流向東朴聞之忿遽隨其後且行

士但策驢而去略不回顧行數里追乃及朴告



之曰朴詩流向西何得言流向東也士人頷之而已閩中傳以爲笑唐末寓於閩中於僧寺假丈室以居諸僧晨粥卯食朴亦攜巾盂廁諸僧下畢食而退率以爲常郡中豪貴設供率施僧朴亦巡行拱手各勺一錢有以三數文與者止受其一得千錢以備茶藥之費將盡復然僧徒亦未嘗厭也黃巢至福州求得朴問曰能從我乎答曰我尚不仕天子安能從賊巢怒斬之

唐詩

紀事

邱光庭傳

邱光庭烏程人

談志

太學博士乾甯時烏程尹余

蟾以圖經不載蘇許公李相國故事乃檄請光

庭編輯遺墜其或善未書能未紀者罔不畢錄

楊夔烏程修  
建康守記

天祐三年高澧刺湖

談志

延光庭校

書樓中

清異錄

殷文珣題其居云草元門似山中

靜不是公卿到不開

吳興藝文補

著兼明書引據典

核辨訂詳明

四庫全書提要

弟光業號庚村

談志

有詩集

宋史藝文補

張先傳

以下宋

張先字子野烏程人天聖八年進士詩格清麗

尤長於樂府

談志

客有謂先曰人皆謂公張三中

卽心中事眼中淚意中人也先曰何不目爲張

三影客不曉先曰雲破月來花弄影嬌柔嬾起

簾籠捲花影柳徑無人墜絮飛無影此余平生

所得意也

古今詩話

李公擇守吳興招先及楊元素

陳令舉與蘇子瞻劉孝叔集於郡圃號六客

談志

先作一叢花詞云沈思細恨不如桃杏猶解嫁

東風一時盛傳歐陽永叔尤愛之恨未識其人

先至都謁永叔閫者以通永叔倒屣迎之曰此

乃桃杏嫁東風郎中子瞻守杭先尚在嘗預宴

席有南鄉子詞

過庭錄

卒章云也應旁有老人星

蓋以自謂是時年八十餘矣子瞻數與倡酬聞

其買妾爲之賦詩皆用張姓事

書錄解題○東坡詩云詩人老

去鶯鶯在公子歸來燕燕忙詩

謂張籍公子謂張祐見侯鯖錄人晚歲優游鄉

里常泛扁舟垂釣爲樂至今號張公釣魚灣仕

至都官郎

案張先會知虢州渝州鹿邑見梅宛陵詩集

卒年八十九

葬卞山多寶寺之右有文集一百卷唯樂府傳

於世

談志子文剛字常勝好學能文再舉進士不

第

王臨川集張常勝墓志○陳振孫曰本朝有

兩張先皆字子野其一博州人天聖三年進士歐陽公作墓志其一天聖八年進士則湖州人也二人名姓字皆同而又適同時不可不知

賈收傳

賈收字耘老有詩名

談志

仁宗朝梅摯守杭上賜

詩有云地有吳山美東南第一州梅以名堂士

大夫留題甚衆蘇軾倅杭因令筆吏盡錄之而

未著其姓名遂以收詩爲冠詩云吳越不藏千

里色斗牛常占一天寒

庚溪詩話

收所居有水閣曰

浮暉李公擇常蘇子瞻軾爲州與之游唱酬極

多

談志

軾常游何山道場山回值風雨艤舟於浮

暉命官奴秉燭掃風雨竹於壁間或刻之石收

素貧軾每念之常寫古木怪石書其後以贈蘇

去收作亭以懷蘇名之有詩一編號懷蘇集

東坡

集參  
談志

朱臨傳

朱臨字正夫歸安人皇祐元年進士授祕書丞

嘗從安定先生學

談志

安定著春秋辨惟臨得之

爲精臨晚年好唐陸淳學淳爲纂例辨疑二書  
臨謂孔子沒千有餘年說春秋者皆膠於偏見  
無出淳書之右者雖董仲舒爲兩漢通經第一  
然猶拘於穀梁不克別白餘可知也蓋卓卓有  
所見如此臨初以丞相呂公著薦入官歷宣德

郎守光祿寺丞以著作佐郎

浦陽人  
物記

大理寺丞

進殿中丞致仕詔曰爾以文中科不顧升斗之

祿去而歸里從容乎湖山之樂不亦高乎進秩

一等將遂爾之雅操焉

耶溪  
集制

居吳興城西取訓

詞中語作仰高亭於城上時年四十杜門謝客

泊宅  
編

安定先生沒後臨爲鄉邦學者所宗儒風

日盛有學田記宣化院記傳於世

談子服  
列傳

別有  
傳

丁注傳

丁注字葆光歸安人熙甯六年進士

談志知永州

喜爲歌詞世所傳催雪無悶及重午慶清明皆

有承平閑雅氣象

書錄解題

嘗爲試官有落解者作

啟事痛詆注注復其啟曰韞匱而藏何妨於待

賈之玉踊躍自試真所謂不祥之金

北窗炙

注

故居在清源門內前臨茗水築山鑿池號寒巖

一時名士洪慶善王元渤俞居易芮國器劉行

簡曾將隱諸名士皆有詩

癸辛雜識

張大亨傳

張大亨字嘉父雪川人元豐八年登乙科

春渚紀聞

政和七年爲司勳員外郎奏朝廷講讀之官謂



之侍讀侍講而諸王府亦有侍讀侍講官不當  
比擬稱呼相紊名之不正孰大於此詔改諸王

府侍講爲直講侍讀爲贊讀

玉照新志

少問春秋於

蘇軾著有春秋通訓十六卷春秋五禮例宗十

卷歷官直祕閣

書錄解題

提學

春渚紀聞

劉燾傳

劉燾字無言長興人誼

別有傳

次子元祐三年進

士時馬涓張庭堅等四人擅名太學時號四俊

燾年少亦負才初補太學生聞而慕之以刺謁

之曰不識可當一俊否涓等哂之燾復請曰何

得見哂涓等設詭計以困之曰每句當預約一  
字限於程試中用之善者乃預既而私試燾乃  
請字曰第一句須用將字其時策問神宗實錄  
燾對曰秉史筆者權猶將也雖君命有所不受  
而況其他乎史筆爲第一聞者服之輿地紀勝  
引太學上  
席錄時蘇軾知舉讀其文曰必巖谷間苦學者中  
第三人廷對又中甲科軾薦燾文章典麗可備  
著述科帥中山時以蜜漬荔枝遺之詩末章云  
詩清真合與君嘗歸朝趙民彥嘗云在虜中飽  
觀燾文尤善書筆勢道邁黃山谷云無言箋題

不類今人書江左復生羊欣薄紹之矣在館中  
時被旨修閣帖十卷所謂續法帖者是也嘗注  
聖濟經編修道史有遺文五十卷號南山集

參宋  
書錄

吳侗傳

吳侗字公度烏程人幼補太學第一崇甯五年  
試禮部又第一吳興素號多士自開寶迄是年  
未有魁禮部者至侗鄉人榮之

談志

名聲風采人

莫不求識面而願交遂經學妙語言爲時聞人  
初自刪定勅令所出爲甯海推官時蔡京罷相

居城中意其生計從容委買雪川土物無虛月  
倜意不平念吾以文學起身不以儒者見遇報  
以實直京覺之而怒重和二年召爲九域圖志  
所編修官上問京識推官吳倜乎今以大臣薦  
欲除官對曰識之其人傲狠無上上驚曰何以  
知之曰吳知陛下御諱而不肯改乃以一圈圍  
之蓋言倜字也上默然不懌言者承風旨論罷  
自是不復出及京敗知鄆州

齊東野語

### 賈安宅傳

賈安宅字居仁烏程人收從孫年十八入太學

陞上舍大觀三年進士魁天下除校書郎兼康王府贊讀建炎中以舊學爲給事中封駁無所

回避紹興二年除工部侍郎累遷戶部侍郎

談志

參纂崇禮

北海集內制及李心傳朝野雜記

建炎二年以徽猷閣待

制致仕紹興二年落致仕除給事中十二月試工部侍郎旋除吏部侍郎三年正月右司諫唐燁劾之安宅自辨甚悉惟不與葉夢得偕行勤王交給富民張子琛有實四月罷爲徽猷閣待制提舉洞霄宮燁言不已乃降爲集英殿修撰十年六月卒

繫年要錄六十二又一百三十六

歷仕三朝累司

文柄其所選掄皆得成材徽宗嘗手詔獎諭之  
子選詳明典故通達治理爲刑部侍郎

談志

陸元光傳

陸元光字蒙老歸安人元符元年以通直郎知  
晉陵縣頗喜作詩時州幕官有好護謗同列者  
一日同會聞蟬幕官謂元光曰君旣能詩可詠  
此也因卽席爲之曰綠陰深處汝行藏風露從  
來是稻梁莫倚高枝縱繁響也應回首顧螿螂  
其人聞而少戢

宋本庚溪詩話參毘陵志○又有陸元公字明遠長興人見進

表士

張有傳

張有字謙中吳興人自幼喜小篆以說文爲正

書錄解題

篤志古道傷俗學之混淆爲書一編號曰

復古考證精詣字之合於古者皆所不論惟俗書亂之者必正其譌舛毫釐不貸其落筆作篆如真行然畧無艱辛之態惟體修而未重與世小異與漢元成間谷口銅甯款識正同魏字从委从嵬或省山以爲韓魏之魏有爲林中書篆墓碑終不肯去山字古無菴字有以爲當作閹而難於題扁山谷雖定从草有亦不用嘗篆楊

龜山踵息菴記終篇偶無此字碑額雖从广竟

作隸體書之其信古不从俗類如此

樓攻媿集復古編序

其辨形聲分點畫剖判真偽計較毫釐視徐楚金兄弟及郭恕先尤精密其有功於許氏甚大年五十餘成此書崇甯以來用篆籀名一時者以有爲最晚棄家爲黃冠殆世外士爲陳了翁所敬服

李燾說文解字後序

劉唐稽傳

劉唐稽字林宗長興人珏子能嗣守家法治一室曰養浩齋會朝廷設十科選士翰林學士汪



藻獨薦唐稽又發明浩然之說爲記刻之已乃  
出佐閩舶於泉南官閒事少博極羣書文辭蔚  
然所交多一時名士歲滿代歸囊無一物獨有  
錢行詩文數十篇後由宗司丞擢守常州

孫覲書泉

山贈

言後乾道九年主管崇道觀

毘陵志

沈長卿傳

沈長卿字文伯號審齋居士

書錄解題

歸安人靖康

元年上書曰靖康元年二月二十三日太學生

沈長卿謹昧死再拜獻書於皇帝陛下臣觀自古天下國家所以敗亂而不可救者始於人君

賞罰之不明也蓋賞罰者人主之大柄古者爵人於朝與衆共之刑人於市與衆棄之欲其合天下之公心不敢有異議而已舜之舉十六相也天下之人謂之八元八愷其竄四凶也天下之人謂之禱杌謂之饗饗夫八元八愷禱杌饗饗非舜舉之也天下之人共舉之也非舜罰之也天下之人共罰之也聖人賞罰之柄如此漢唐之末時君世主昏昧不明賞罰之柄奪於權臣其所賞者未必有功也所罰者未必有罪也賞罰不明天下解體亂亡隨之如漢之哀平唐

之懿僖此數君者未必如桀紂之暴亂酷虐惟其賞罰不公使忠臣義士啣恨而死是以至於滅亡爾恭惟皇帝陛下卽位之初大明誅賞以示天下當取法於堯舜可也而比頒明詔前後或異若有姦邪罔上之臣乘擾攘之際亂陛下之聰明者臣少負耿介慕劉蕡賈誼之言得事君之節而小仲舒之論緩而不切憤然有意於劉蕡請爲陛下直言而不諱也臣聞二月初五日陛下罷李綱右丞太學陳東等率士數百伏闕上書極言李綱忠義李邦彥姦惡冀陛下聰

明睿斷罷邦彥而相李綱以厭天下之論也於  
時京城百姓羣聚闕廷不約而來者幾數萬人  
仰天椎心祈哀請命莫不欲李綱之相邦彥之  
罷也洎陛下遣使宣諭復綱舊職衆志遂定其  
後乘時恃衆毆擊內豎蓋緣平居細民受虐之  
深積怨之久今日戎虜擁兵困辱中國奪我玉  
帛侵我土地非由此曹何以致之故危疑之間  
發其至痛以至於是非人有所教而爲之也夫  
舉數萬之衆不煩召而羣聚帝閭若出一家會  
無異意者豈陳東一布衣寒士所能驅率哉蓋

其平日公論如此不勝其忠義憤激之切欲訴於陛下爾諂諛無知之人阿附邦彥自植朋黨不問士庶所以伏闕者何心所言於天子者何事中外憤駭里巷蕭然鬻舍一空臣始聞之而驚中聞之而疑卒聞之而解以爲布衣書生以忠義被戮得與龍逢比干並名書史乃萬世之榮然天子聰明仁聖今日之事當自有以辨之必不惑於佞也其後學官黃哲等待罪陛下親降聖旨朝廷方開言路通達下情士人伏闕上書乃是忠義所激爾等何爲待罪宜速安職曉

諭諸生太學之士仰觀聖訓感激流涕如蒙異  
恩謂陛下好賢樂善之誠如此自今以往天下  
忠言讜論日聞於九重必不至鉗口結舌如前  
日也有君如此其忍負之稱誦未已詔墨未乾  
陛下復降御寶以諸生伏闕係赦前已放罪更  
不根治今後如或不改復出鼓唱亂朝廷紀綱  
當議極刑又觀殿前司曉示備載御寶以士庶  
有以伏闕上書爲名者意在作亂今後如更似  
此之人仰三衙收捉並從軍法令王宗濞斬訖  
聞奏臣雖至愚心知前日姦邪之人重以變亂

之說惑陛下者是致陛下德音終始反覆之如是也臣觀秦始皇雄才大略英睿之主也一用趙高李斯遂以上古爲不足學三代爲不足法盡取上古之書而焚之當時天下之士有復於上者皆以爲妖言使御史按問其罪羣聚而坑之四百六十餘人是忠臣義士被坑戮之禍遁逃竄伏甘心於隴畝之間不敢以儒自名其謀實出於斯高始皇信之而不悟也天下士旣已盡棄始皇於是內修宮室外事四夷信惑神仙巡遊不息恣所欲爲而無敢有言其非陵夷至

於二世不改始皇之業以致大亂輟耕隴上之徒奮臂一呼天下響應禍在焚書坑儒而已今姦邪之人欲罪伏闕之士而陛下得此名於後世臣所謂捫心痛哭思欲犯顏逆鱗以自踊於鼎鑊也夫人主所以示天下者賞罰也某人當誅必明其可誅之罪功罪不明而妄興賞罰使天下歸怨則謂之暴君可也陛下如以前日之事爲可赦不識諸生以何罪而得陛下之赦乎以後日之犯爲可誅不識諸生以何罪而得陛下之誅乎且旣名之爲忠義則不當置之於刑



法既置之於刑法則不當名之爲忠義以二者不可兩立也陛下前詔旣以士人爲忠義則後日以犯詔而誅者乃以忠義就刑也忠義者旣不保其首領不忠不義者陛下將何法以加之乎雖然作福作威人君之大柄則殺士之名臣爲陛下過有所惜者萬世之後陛下有殺士之名臣名臣恐自此天下四海忠義之士望風股慄且耕且釣不肯爲陛下用也臣又聞陛下虛懷側席登用儒臣擢徐處仁唐恪等於閒散之地而置之輔佐是以范宗尹朱夢說劉甯止之徒盡

蒙號召將以大用是陛下欲盡求天下忠義之士也忠義之士聞詔未起陛下罪言者之名已聞於天下彼數人者敢再言於陛下乎太上皇帝在位二十六年其間姦臣沮抑忠義之士以言獲罪致斥逐者固多矣然未有如今日之詔欲置敢言之士於極刑也而陛下何獨忍爲之乎臣聞自古賢人君子未嘗不欲其君用者惟其待之不以禮遇之不以誠是以懷鉛抱槧日甘於海濱喁穴而不出也人君惟盡禮而致之屈體以下之虚心以訪之克己以從之猶懼其

不至況示以刑威欲致忠賢之士不亦難哉昔  
燕昭築黃金臺禮郭隗而四方之士莫不奔燕  
齊小白禮九九之術而四方之士莫不奔齊彼  
區區霸者之材非有二帝三王之道德也徒以  
禮賢下士樂爲之用臣願陛下念臣之心察臣  
之言特降聖旨追改前詔優加褒揚使天下之  
士不至於解體則陛下可以得四海之心建長  
久之策而享萬世無疆之休矣臣又觀前日宰  
相吳敏有爲李邦彥辯奸慝暴白功狀大書文  
榜揭之通衢行道之人莫不嗤笑臣聞邦彥自

布衣時不修士檢放僻邪侈無所不爲校娼優  
於酒肆逞顏色於庭闈其淫言媒語往往流傳  
人間有不可聞者其後一時遭遇旋致顯位而  
阿諛順旨偷合苟容坐視姦邪之臣開邊致釁  
會無一言規救人主此乃持祿養交冒利忘恥  
之徒耳而敏方且以功狀揭之市朝欺罔文法  
愚弄天下未有若此吁可怪也且宰相天下之  
屬望任相不賢則天下之人得以議者昔楊綰  
爲相崔寬爲之毀第觀黎幹爲之減騶從郭子  
儀爲之撤聲樂當時公卿大臣猶畏憚之如此

今邦彥身爲宰相而百姓遮道謾罵甚於奴隸疾走省闈掩關自遁其爲辱亦甚矣臣聞司馬光爲相天下兒童走隸亦皆稱頌使邦彥而果賢也則天下之人當自知之當自服之何必因敏言而後明哉就使如敏之言以爲邦彥畏慎太過緩於事機則邦彥亦不過蘇味道盧懷慎之徒耳以輔庸主且猶不可況可以輔佐陛下成中興之盛治乎臣聞太學之論敏乃蔡京父子上密交奔走京門浸有年矣而邦彥與敏如左右手也今所以曲爲邦彥強辯者正欲植

黨自固邦彥去則敏不能以孤立原敏之心本  
非爲朝廷論宰相實爲身謀耳向使陛下不能  
獨斷而信敏之言復用邦彥則姦臣浸漬事必  
有大於此者誠可爲寒心也臣觀漢之元帝恭  
謹節儉當時號賢君而讒佞愚弄優柔不斷故  
孝宣之業少衰而後世貶之蓋人君之患莫不  
於斯二者願陛下乾綱夬決天下之事斷自宸  
衷勿奪於讒佞勿溺於優柔則萬世之後皆知  
陛下爲賢君矣豈特生靈社稷之幸哉臣爲此  
言臣之友有爲臣言曰子堂上有二親家唯四

壁壘鹽太學苟爲升斗之祿將以養親而爲狂  
直之言上以諫天子下以忤宰相吾謂子無死  
所矣臣應之曰不然昔陽城爲國子司業召諸  
生誨之曰凡學者所以學爲忠與孝也僕生平  
所志在爲忠與孝而忠孝不能兩立苟全一節  
雖死無憾天子仁聖如此而奸邪之人漸以浸  
漬使後世得以輕訾吾君今不言將何以戴天  
而履地乎雖以此受戮不猶愈於今之生乎是  
以不避斧鉞直書其事上千天聽雖蒙誅戮萬  
死無悔冒瀆天威臣不勝惶恐戰慄之至

三朝北盟

會編建炎二年第進士

吳興志

累官臨安府觀察推

官紹興元年上書論范宗尹過失降監都稅務  
宗尹抗疏爲請乃寢二年與虞灃同召試館職  
上諭輔臣以長卿策尚懷朋附呂頤浩曰灃答  
所問長卿乃題外別敘四事皆自外準備乃詔  
長卿已爲湖南安撫使李綱所辟令赴任旋除  
左儒林郎婺州州學教授五年除祕書省正字  
尋不行十八年以左通直郎通判常州三月以  
將作監丞改判嚴州十九年十月罷嚴州經進左  
奉議郎長卿嘗與李光啟云搢紳競守和親甘



出婁欽之下策夷狄難以結信孰虞吐蕃之給  
盟與其竭四海以奉豺狼之歡何至辱萬乘而  
下穹廬之拜秦檜惡之又與芮燧同賦牡丹詩  
有甯令漢社稷變作莽乾坤之句爲隣舍人所  
告以爲譏訕二十五年追兩官停勒送化州編  
管繫年要錄參輿地紀勝檜死復朝奉郎主管台州崇道  
觀三十年葉義問使金辟爲書狀官至燕而疾  
比還卒於保州繫年要錄著有西漢總類二十六卷  
讀書附志春秋比事二十卷

沈作喆傳

沈作喆字明遠丞相該

別有傳

姪

書錄解題

歸安人紹

興五年進士

談志

從葉石林於卞山葉授以制科

之學嘗官維揚秦檜既主和議大帥皆罷兵柄

賜田宅作喆爲岳武穆作謝表云功狀蔑聞敢

遂良田之請謗書狎至猶存息壤之盟檜讀之

不樂

寓簡

以左奉議郎爲江西轉運屬官秩滿就

須新任之次閒賦哀扇工詩罵而非諷

梅澗詩話參清

波別志

志中

詩時魏良臣爲洪帥有士子與作喆

往來極款洽一日侵晨來訪作喆猶在寢遂徑

造書室翻篋中紙詩稿在焉由是達良臣聽陷

以深文効之坐奪三官

梅磻詩話

不得志

書錄解題

屏居

山中每閉閣焚香凝神著書或引接名流劇談

名理或觴詠自娛一斗徑醉撰已意若干卷

寓簡

寓簡十卷寓山集三十卷

宋史藝文志

葛立方傳

葛立方字常之勝仲子

名宦錄

其先丹陽人勝仲

再知湖州後遂家焉

書錄解題

紹興八年進士

談十志

四年官左奉議郎諸王宮大小學教授上言陛

下決策定計成此中興親迎長樂之鑿輿坐息

邊陲之烽火格天之業實無前比臣雖微賤惴

喘焉惟恐讒說潰成搖動國是早夜思之弗置也伏望特降詔旨申飭臣工使之精白一意上承休德如有懷奸弗靖煽惑士流者令御史臺覺察流之四裔永爲臣子不忠之戒從之

繫年要錄

第一百

五十一 累官太常博士十七年除祕書省正字

以提舉秦熇薦兼編纂書籍官十九年遷校書郎二十一年擢尚書考功員外郎兼權中書舍人立方本秦檜所親厚及是又與檜忤右正言章厦希旨劾其輕恣遂罷

繫年要錄參書錄解題

歸休於

吳興泛金溪上暇日率同志拏小舟載魚蝦鼈

蟹命比邱誦法作梵唄捨之溪中

陽秋序

二十五

年檜死召爲考功員外郎明年擢左司郎中充  
金生辰使二十七年權吏部侍郎旋出知袁州  
二十九年御史任古論其賄沈該之子罷歸及  
事白而立方已卒

繫年要錄及附  
葛郊歸愚集跋

著有韻語陽

秋歸愚集

書錄  
解題

子郊郊

宋史○郊  
別有傳

周頡傳

周頡字元吉長興人紹興十五年進士

勞瀆熙  
志

三年知德安府慕應山連庶連庠之爲人建慕  
連亭時謂頡以郡守而能屈於同時之賢過人

遠矣德安府志十六年以朝議大夫直顯謨閣提點

浙東刑獄紹熙元年除福建轉運使會稽續志嘗與

楊萬里程太昌洪邁相倡酬有詩二卷勞志右正

言鄭丙丞相史浩詹事沈樞尚書汪大猷與頡

爲同年進士紹熙末皆退休於二浙詩筒酬倡

人競傳之周必大鄭丙神道碑有適菴集百卷勞志

莫汲傳

莫汲字子及歸安人紹興十八年進士同年居

前列一時聲名藉甚齊東野語二十五年官衢州府

教授時趙令衿自知泉州代還寓居衢州嘗延

客觀月因觀秦檜家廟記口誦君子之澤五世而斬之句汲於坐間聞之告令衿評論日月無光謗訕朝政擢左從事郎行國子正秦檜死高宗痛懲告訐人十二月除名化州編管建炎以來繫年要邦之秀民多從之學自號月河輿地紀勝汲素負豪邁之氣暇日具舟招賓友泛湖上呼大白連酌賦詩興盡乃返齊東野語弟冲字子中紹興十八年進士隆興二年除校書郎乾道元年二月知

饒州中興館閣錄

施元之傳

施元之字德初長興人紹興二十四年進士

談志

以絕識博學名天下

陸游東坡詩注序

乾道二年除祕

書省正字五年五月除祕書省著作佐郎十月

除起居舍人十一月兼國史院編修官是月除

左司諫

中興館閣錄

尋遷左正言五年汪應辰上李

屋詞業有旨召試元之方候對爲起居郎兼權

中書舍人林機言故事無獨試者當繳之機卽

奏繳錄黃元之亦奏祖宗制科之設自有典故

今屋詞業雖付後省未有許令參考指揮遽有

召試中書之命未應前後典故兼國子監看詳



明言令送兩省侍從參考況閣試大論本朝典故錄三四人以上糊名考校無一名獨試者乞重此非常之科且以扈詞業令有司公共參考來上俟繼有一二人然後俾之就試庶幾有得賢之實無倖進之譏詔令參考繼聞二人握手私語乃大怒詔林機施元之身居納言之地朋比相通並放罷虞允文言不當罪

朝野雜記

七年

起左宣教郎權發遣衢州軍州主管學事兼管內

勸農事

五代會要跋

入對論用人責小過大詳孝宗

深然之

宋史全文

於衢州郡立月波亭及超覽堂毛

开爲之記

宏治衢  
州府志

復遷贛州太守急於繩吏吏

游飲者札杜穎簿錄其家穎袖還曰罪由邏發

懼者衆矣元之矍然而罷已爲提刑辛棄疾以

私意劾罷

劉後村集  
杜穎墓志

嘗注蘇詩與吳郡顧景蕃

共爲之元之子宿從而推廣且爲年譜以傳於

世

書錄  
解題

陸游序之曰用功深歷歲久於東坡之

意可無遺憾

東坡詩  
注序

沈清臣傳

沈清臣字正卿烏程人紹興二十七年進士

談志

授太學錄

盤洲集  
內制

投匭上書言王希呂本歸正

人不可用爲諫官諫院不敢受清臣乃錄本呈  
宰執臺諫虞允文怒奏其事兼疑沈介教之乃  
下清臣大理鍛鍊久之非介教唆遂坐書未進  
御錄本示人編管封州

周必大集  
奉詔錄

淳熙中放還

除敕令所刪定官高宗崩孝宗欲行三年之喪  
執政近臣皆主易月之說諫官謝錡禮官尤袤  
心知其不可而不敢盡言清臣上書乞俟梓宮  
發引方還大內又言今日喪禮與明肅皇后事  
體不侔望斷自淵衷勿見北使凡論有六事八  
千餘言展讀甚久上意極合讀竟勞之曰卿二

十年閒廢今不枉矣

宋史參癸辛雜記朝野雜記

再上疏願

堅聽大事於內殿之旨將來祔廟畢日請預降

御筆截然示以終喪之志帝納用焉

宋史參宋史全文朝

野雜記

淳熙十五年清臣又因對言陛下臨御以

來非不論相也始也取之故老重臣既而取之

潛藩舊傳或取之詞臣翰墨或取之時望名流

或取之刑法能吏或取之刀筆計臣或取之雅

重詭異或取之行實自將或取之跣跣誕慢或

取之謹畏柔懦或取之狡猾俗吏或取之勾稽

小材始也取之奸豪譎詐枵然空鄙之夫而卒

也任之隨順柔懦委靡無自立之志既取之又任之又從而禮貌之未嘗不注意也然皆非相也間有度量沈靜而經畫甚淺心存社稷而材術似疏表裏忠黨而規制良狹其他則以空疏敗以鄙猥敗以欺誕敗以奸險敗以浮夸敗以貪墨敗以譎詐敗以委靡敗若此者豈所謂相哉甚至於誤國有大可罪者海泗國家之故地也私主和議無故而棄之夷虜騎兵天子之宿衛也不能進取無故而移之金陵汲引狂誕浮薄之流以充塞正途擅開佞倖權嬖之門以自

固高位而今也循習前轍寢成欺弊國有變故  
略無建明事有緩急曾不知任然則焉用彼相  
哉旋除國子監丞十六年光宗卽位遷祕書丞

宋史兼嘉王府翊善以直諫稱書錄未幾罷爲

主管台州崇道觀宋史卽所居治圃築亭揭曰

潛溪多所賦詠談志甯宗卽位起爲江東提舉魏

集內終於祕閣修撰清臣嘗從張无垢學居嘗

川城南創晦巖書院以來四方學者談志參書

章沖傳

章沖字茂深長興人子厚曾孫葉夢得壻書錄

解題

爲蘭陵令

樓政媿集內制

淳熙七年以朝奉大夫知常

州八年以賑濟有勞轉朝散大夫

咸淳昆陵志

十年

以金部郎中知楚州

吳莘楚州修學記

十四年以奉直

大夫知台州少侍夢得爲學使執左氏之書從

旁檢閱

左氏傳事類始末自序

講學有源流下筆驚人嘗

五舉於漕臺卷末嘗釋手故其從政知所後先

凡三爲州慈祥樂易所在歌詠之重建楚州學

悉依湖學安定先生之舊以規矩示諸生

楚州學記

弟淵字伯深博學有文用蔭入仕居長興自號

懲室子著稿簡贅筆

書錄解題

陳振孫傳

陳振孫字伯玉安吉人所居號直齋博通古今

勞

志爲鄞縣學

書錄解題四

紹興教官

齊東野語八

宰南城

三解題

佐興化軍

解題七○

案興化軍治莆田故解題云莆田

有楊氏

訟子及婦不孝逮問則婦之翁爲人毆死楊亦預焉獄未竟值覃霈得不坐其後父又訟子及婦振孫時以倅攝郡謂父子天合夫妻人合在法離絕皆許還合而獨於義絕不許者蓋謂此類若楊婦盡禮於舅姑則爲反親事讐稍有不至反得以不孝罪之初問楊罪旣脫合勒其婦



休離當離不離則是違法在律違法爲婚既不

成婚卽有相犯並同凡人今其婦合比此條不

合收坐時皆服其得法之意焉野語端平四年

以朝散大夫知台州除浙東提舉嘉熙元年改

知嘉興府會稽續志爲浙西提舉體祖宗卹民之意

舉行萬戶停廢醋庫邦人德之王鑿姑蘇志制以振

孫研精經術有古典型除國子司業徐元杰徐楫堃集

元杰暴亡或謂史嵩之毒之振孫亦有疏癸辛雜識

以某部侍郎野語除寶章閣待制致仕贈光祿

大夫劉後村大全家藏舊書五萬卷做讀書志作

解題極其精詳討摭舊事輯吳興人物志

野語十五

氏族志

梅磻詩話

書解易解

志雅堂雜鈔

子造字周士登

第爲嘉禾倅

野語

宋伯仁傳

宋伯仁字器之號雪巖苕川人

雪巖吟草

舉宏詞科

歷監淮揚鹽課伯仁銳意功名有擊楫之概而

祿位不顯語多慷慨然能出之以和易

烏青文獻

自

謂隨口應聲如敗草翻風枯荷鬧雨低昂疾徐

因勢而出嘉熙丁酉寓京遭燕僑居西馬塍與

高菊磻孫花翁施芸隱交友酬倡號西塍集

雪巖

草吟素有梅癖闢圃以栽築亭相對著梅花喜神

譜自錢唐俞桂贈詩有詩與梅花一樣清江湖

久矣熟知名句漁溪乙藁○按烏青文獻又云

日有文如此獨不令我一識面耶然伯仁爲嘉熙時人豈得獻詩於東坡此說殊謬

周密傳

周密字公謹曾祖泌自濟南來寓吳興至密四

世戴表元齊東野語序雅思淵才韜暉沈聲馬廷鸞碧梧

集臺閣之舊章宮府之故事汎濫淹注童而習

之戴表元序藏書萬卷居饒臺榭弁陽山水清峭遇

好景佳時載酒肴浮扁舟窮旦夕賦詠於其間

荆源集并陽詩序最為馬廷鸞所知癸辛雜識寶祐間為義

烏令寶鑑繪景定二年為臨安府幕屬癸辛雜識光祖再尹

京余為帥幕云云案光祖再尹京在景定二年據臨安志監和劑藥局充奉

禮郎兼太祝癸辛雜識前集余為國局云云案和劑局當時稱京局又稱國局監

局三十人以士人經任者為之咸淳十年為豐儲倉所檢察雜識

余為豐儲倉凡二見不言何官案豐儲倉有檢察一員見雜識外集宋運既徂志

節不屈王行半軒集與楊沂中諸孫大受有連去而

寓杭陵陽集復菴記參荆源集所居癸辛街即楊氏瞰碧園

也遺民畸士日接於野荆棘銅駝適當其會石氏

瞻志雅堂雜鈔序唱和者王沂孫王易簡馮應瑞唐藝

孫呂同老李彭老陳恕唐珏趙汝鈞李居仁張

炎仇遠皆宋遺民也

樂府補題

其詩少年流麗鍾情

壯年典實明瞻晚歲感慨激發

剡源集

有蠟屐集

弁陽詩集

碧梧玩芳集

樂府妙天下協比呂律意味

不凡有蕢州漁笛譜

王櫛跋

善畫梅竹蘭石

寶鑑圖繪

多藏法書名畫

柳待制文集題江磯圖後

以鑑賞游諸公

袁清

容集

自號草窗又號弁陽嘯翁又號蕭齋又號四

水潛夫又號華不注山人

癸辛雜識樂府補題武陵舊事絕妙好詞

晚更號弁陽老人由博返約落其英華澄然一

室刻石自銘

陵陽集跋

著有齊東野語癸辛雜識志

雅堂雜鈔浩然齋雅談浩然齋視聽鈔澄懷錄  
乾瀆起居注乾瀆歲時記武林舊事武林市肆  
記湖山勝概弁陽客談雲烟過眼錄絕妙好詞  
石民  
瞻序

牟巖傳

牟巖字獻甫一字獻之父子才大節重一世巖在旁

贊助居多人謂存齋有子矣馭歷踰二紀所至

以廉靖仁厚稱理宗訓辭有曰陵陽集序爾之才學

漢人所稱家之珍寶國之英俊者秉平反之筆

以廣哀矜之意除大理司直劉後村集外制至元丙子

卽杜門隱居凡三十六年

陵陽集序

旣與世相違優

游事外居家庭之間與子應龍自相師友日以

經學道義相切磨學者有所不知必之先生考

質焉其於前朝制度之損益故家文獻之源流

厯厯如指諸掌

黃潛隆山文集序

爲文操筆立就若不

經意而有過人者晚歲筆力愈勁南北學者皆

師尊之達官鉅人向慕拜謁求文者相屬於門

文益富於壯作年八十五以終

陵陽集序

儀顧堂集卷十三終

儀顧堂集卷十四

歸安陸心源撰

湖州府志人物傳藝術

曹不興傳

吳

曹不興

一作弗興

烏程人善畫孫權使畫屏風誤落

筆點素因就以作蠅既進御權以爲生蠅舉手

彈之

吳志趙達傳注引吳錄

赤烏中之青溪見赤龍出水

上寫獻孫皓皓送祕府至宋朝陸探微見畫歎

其妙因取不興龍置水上應時蓄水成霧累月

霧霈

張彥遠歷代名畫記

時上虞吳範治厯數平原劉惇



達占數河南趙達治九宮一算之術江都皇象  
工書嚴武圍碁莫與爲輩菰城鄭姬善相不興  
善畫八人世皆稱妙謂之八絕

三國志  
參吳錄

張僧繇傳

梁

張僧繇吳興人

姚最續畫品○案張彥遠名畫  
記云吳中人當混而言之最武

康人從梁入周其時目擊當  
不妄指他郡人爲吳興人也

天監中爲武陵王

國侍郎直祕閣知畫事歷右軍將軍吳興太守  
武帝崇飾佛寺多命僧繇畫之時諸王在外武  
帝思之遣僧繇乘傳寫貌對之如面也江陵天  
皇寺明帝置內有柏堂僧繇畫盧舍那佛像及

仲尼十哲帝怪問釋門內如何畫孔聖僧繇曰  
後當賴此耳及後周滅佛法焚天下寺塔獨以  
此有宣尼像乃不令毀拆又金陵安樂寺四白  
龍不點眼睛每云點睛卽飛去人以爲妄誕固  
請點之須臾雷電破壁兩龍乘雲騰去上天二  
龍未點眼者見在初吳曹不興圖青谿龍僧繇  
見而鄙之乃廣其像於武帝龍泉亭其畫草留  
在祕閣時未之重至太清中震龍泉亭遂失其  
壁方知神妙又畫天竺二胡僧因侯景亂散圻  
爲二後一僧爲唐右常侍陸堅所寶堅疾篤夢

一胡僧告云我有同侶離圻多時今在洛陽李

家若求合之當以法力助君陸以錢帛果於李

家購得疾乃愈劉長卿為記述其事張畫有所

靈感不可具記張彥遠歷代名畫記僧繇善圖寺壁超越

羣公價等曇度朝衣野服古今不失奇形異貌

殊方夷夏皆參其妙唯公及私手不釋筆俾畫

作夜未嘗倦怠數紀之內無須臾之間然聖賢

矚矚猶乏神氣豈可求備於一人雖云晚出殆

亞前哲續畫品子善果標置點拂殊多佳致善果

弟儒童名畫記

朱肱傳 以下宋

朱肱字翼中

一作歸安人

泊宅編 元祐三年進士

談志 喜論醫尤深於傷寒在南陽時太守盛次仲疾作召肱視之曰小柴胡湯證也請并進三服至晚乃覺滿又視之問所服藥安在取以視之乃小柴胡散也肱曰古人製咬咀謂剉如麻豆大煮清汁飲之名曰湯所以入經絡攻病取快今乃爲散滯在鬲上所以胃滿而病自若也因依法旋製自煮以進二服是夕遂安因論經絡之要盛君立贊成書蓋潛心二十年而活人書

成嘗過洪州聞名醫宋道方在焉因攜活人書  
就見宋留肱款語坐中指駁數十條皆有考據  
肱惘然自失卽日解舟去

泊宅編

屬朝廷大興醫

學求深於道術者爲之官師起肱爲醫學博士  
坐書東坡詩貶達州以宮祠遷僑居西湖上

北山

酒經  
詩序

錢選傳

錢選字舜舉號玉潭

李日華云  
又號巽峯

烏程人景定三

年進士元初吳興有八俊之號以子昂爲稱首  
而舜舉與焉及子昂被薦登朝諸公皆相附取

宦達獨舜舉齟齬不合流連詩畫以終其身人

物山水花鳥師趙昌青綠山水師趙千里尤善

作折枝其得意者賦詩其上畫史會要嗜酒酒不醉

不能畫然絕醉不可畫矣惟將醉醺醺然心手

調和時是其畫趣畫成亦不暇計較往往爲好

事者持去剡源集嘗借人白鷹圖夜臨摹裝池翌

日以所臨本歸之主人弗覺也鄉人經舜舉指

授類皆以能畫稱家有習懶齋因自號習懶翁

雪川翁清癯老人皆其別號也吳興舊聞補引妮古錄

湖州府志人物傳寓賢

方勺傳 以下宋

方勺字仁聲金華人潘良貴稱其超然遐舉神情散朗如晉宋間高士其詩文雄深雅健追古

作者

萬曆金華府志

喜交當世名士士亦樂從之遊

建康

集

寓烏程泊宅村閱金石遺文昔張志和浮家

泛宅往來苕霅間此乃志和泊舟之所也

泊宅編

號泊宅翁扁舟苕霅之上興之所至輒悠然忘

歸著泊宅編

洪興祖泊宅編序

徙西溪因誦杜子美詩

至何時一茅屋送老白雲邊欣然以爲與其意合乃名其居曰雲茅庵因東岡爲小亭號茅墩

欲傍溪開水檻久無資會郡守有饋之酒五十  
壺不飲亟易之乃克成平生詩文甚多隨手散  
去著有雲茅漫錄

建康集

王洋傳

王洋字元渤山陽人

淮安府志

以省第二名中宣和

二年甲科紹興初以右贊善命直徽猷閣歷典  
三郡所至有異政官太學博士時秦檜爲丞相  
而直道正辭亦擯勿用晚守鄱陽洪忠宣皓適  
以使北歸人無敢過其居洋獨修謁故坐事免  
去葉夢得嘗爲洋言劉貢父爲漢史詩以爲杜



詩功曹非復漢蕭何爲誤用事信乎洋曰高紀  
蕭何爲主吏孟康注曰功曹也王定國猶知之  
詩史豈誤哉夢得歎服吳興備志引洋寓居德  
清與方淑鄒樗劉一止最善勞志撰東牟集三十

卷

湖錄

李迎傳

李迎字彥將河陽人靖康初以父恩補將仕郎  
南渡後歷錢唐令有善政改知歸安歷福建安  
撫司主管機宜文字通判臨安府尋乞祠歸寓  
湖州新市鎮蕭寺中手鈔治心養性之要時時

賦詩爲樂嘗自贊曰三仕三已應緣而止一邱

一壑倦遊而歸

周益公集李迎墓表

撰濟陰老人遺橐

書錄

解

卒葬烏程縣三碑鄉金山之原

墓表

子結字元

明號次山又號漁社後以尚書郎奉使全蜀念

舊社不置繪霅漁社圖周必大爲之跋

周益公集題跋

蕭德藻傳

蕭德藻字東夫三山人紹興進士嘗宰烏程後

遂家焉

書錄解題

德藻文學甚古氣節甚高其志嘗

有爲其進未嘗苟合老而不遇士論屈之嘗爲

湖北參議官

楊萬里涪熙薦士錄

所居弁山千巖競秀自

號千巖老人楊萬里云近世詩人若蕭千巖之  
工緻余所畏也著有千巖擇彙

千巖擇  
彙序

龐謙孺傳

龐謙孺字祐甫單父人南渡後構墅蘋洲買莊

谿山耕桑自給

書錄  
解題

紹興十年以明堂恩奏爲

將仕郎歷授鎮江府觀察推官爲詩原於古樂

府有自得之妙爲文欲如先秦古書雅奧而奇

崛不蹈世俗畦畛以是議論輒驚人往往蓬首

曳杖吟哦草中田野土人皆識其爲謙孺也乾

道三年權監饒州景德鎮旣而死韓元吉遣吏

護其喪歸且斂故人之錢買田付其子而吳興

士夫又合力葬之於周塘村著有白蘋文集十

卷

南澗甲乙橐  
龐祐甫墓志

沈度傳

沈度字公雅儀真人

朱子崇安社倉  
記參揚州志

居德清范成

大驂鸞錄有過德清往公雅考室語案揚州  
志以爲播之曾孫播本德清人故公雅復居德

清也紹興中令餘干田無廢土市無閒居獄犴無

宿繫民謳歌之

江西通志

隆興二年以考功郎中除

直祕閣知平江府乾道二年七月召赴行在上

曰甲申之歲委卿守吳門未幾治行昭著可謂

得人又曰二年以來水澇軫憂惟恐懼修省以  
百姓爲念耳度奏臣到郡水歉艱食蒙陛下捐  
四萬石馬料以賑濟全活甚衆上曰太守措置  
漢宣帝所謂與我共理者其惟良二千石乎卽

以爲中書門下檢正諸房文字

王鏊姑蘇志

乾道四

年以直龍圖閣知建甯府當是時朱子居崇安  
與鄉士劉如愚創立社倉度以錢六萬緡助之  
晦庵集崇安縣五夫社倉記 乾道九年以權兵部侍郎兼臨

安少尹淳熙改元除權兵部尚書旋除龍圖閣

待制在外宮觀

咸淳臨安志

韓元吉傳

韓元吉字無咎開封雍邱人門下侍郎維之元

孫

書錄解題

兄元龍長於治縣知天台縣除司農寺

主簿升寺丞

繫年要錄一百八十二

一徙居信州之上饒所

居之前有澗水號南澗

江西通志

詞章典麗議論通

明爲故家翹楚

周必大玉堂類彙

嘗赴詞科不利

書錄解題

以陰爲處州龍泉縣主簿

雙蓮堂記

調南劍州主簿

送連必達序

紹興二十八年知建安縣用廣而賦嗇

乃懋遷鹽鹺以佐其費

福建通志

二十九年以輔臣

薦召赴行在三十二年除司農寺主簿

要錄一百九十一

二 乾道三年除江東轉運判官以明道伊川弟

子所編師說十卷刊置漕齋

甲乙稟書師說後

四年以

朝奉郎入守大理少卿

甲乙稟崇福庵記

權中書舍人

甲乙

八年權吏部侍郎時朝士因言張說多去

國者元吉進故事述太祖太宗之訓以諫

甲乙稟進

故事九年權禮部尚書賀金生辰使

金史交聘表

凡所

以覘敵者雖駐車乞漿下馬盥手遇小兒婦女

皆以言挑之往往得其情使還奏言敵之強盛

五十年矣人心不附必不能久宜合謀定算養

威蓄力以俟可乘之釁不必規小利以觸其幾

孝宗然之除吏部侍郎淳熙元年以待制知婺

州

書朔行日記後

於郡西南隅創貢院工作方興明年

移知建安府

貢院記

表率端莊加意學校創修郡

志以軍興調發功轉朝奉大夫

通志

旋召赴行在

以朝議大夫試吏部尚書進正奉大夫除吏部

尚書五年乞州郡

周必大玉堂類稿參甲乙

類稿

除龍圖閣學

士復知婺州

極目亭詩序

罷爲提舉太平興國宮爵

至潁川郡公

甲乙

嘗寓德清之慈相寺東萊呂

成公其婿也相與講讀於寺西竹林精舍故寺

中有東萊書院嘉熙間縣令章鑑創屋額曰東



萊讀書堂

西吳里語

元吉少受業於尹和靖之門嘗

舉朱子以自代與葉夢得陸游沈明遠趙蕃張

浚相倡和

甲乙

政事文章爲一代冠冕

詞苑

朱

子稱其詩有中原和平之舊無南方啁哳之音

語類

著有易繫辭解蕉尾集南澗甲乙

宋史

袁說友傳

袁說友字起崖建安人寓居湖州號東塘野士

家傳隆興元年進士

中興館閣錄

調建康府溧陽主簿

歷國子正宗寺主簿樞密院編修官

家傳嘗進八

論一曰選舉當求可行二曰養士大夫氣節三

曰臺諫當伸其氣四曰臣職當先民事五曰准

守當用武臣六曰銓曹當革其弊七曰簾試當

革其弊八曰蜀將當慮其變

東塘集八

淳熙四年除

祕書丞五年添差浙西安撫使參議官

館閣錄

七

年知池州歲旱奏發粟二萬以賑

東塘集池州勸農文

主

管建甯府武夷山冲佑觀起知衢州

家傳

十六年

提舉浙東路常平

會稽續志

奏言常平所儲不多或

遇歉歲無以均斂散而平貴糴浙東州縣米數

尤少請住賣沒官田產已賣者收米解倉未賣

者召佃輸租

東塘集九

旋除浙西提刑

家傳

紹熙元年

除直祕閣知平江府本年入爲侍左郎中

姑蘇志參

家傳

三年除大府少卿兼知臨安府

臨安志

彈壓之

外加意惠民奏請停催紹熙元二兩年百姓積

欠殘零苗稅

東塘集

十二 詔獎獄空四年除權戶部

侍郎

臨安志

奏言糾役之害甚於差役立二說以

懲糾役之弊使已役者可以當替而得脫當代

者不容妄糾而幸免

東塘集

九 光宗久缺定省之禮

說友奏請過宮疏凡十二上

東塘集

十三 時國家多

故事緒浩穰歲屬大禋調度不給說友通敏有

餘獨任大計內無缺供之急外無誅求之怨

攻媿

集外

過歲爲真兼侍讀

家傳

光宗卽位說友奏六

事一曰孫爲祖服當行周期之制二曰起居郎  
陳傅良樞密院編修張方皆一時人望宜令依  
舊供職三曰廣開言路崇用臺諫四曰應樂人  
及俳優伶官權令逐退終喪後續聽指揮五曰  
求言貴於能聽聽言貴乎能行六曰嚴父莫大  
於配天若行明堂則於尊父之禮有礙仍舊講  
行郊祀之禮

東塘集  
十三

權戶部尚書慶元三年除

華文閣學士四川制置使御書漢文翁龔遂二

事以寵其行

東塘集十  
九

參家傳說友聞廣惠倉米有名

無實卽委官相視陳腐者於見管軍糧內對兌  
銷損者措置補足四年三路荒旱或充賑糴或  
撥賑濟小民得免於死賑濟結局百計措置於  
慶元五年補糴足額又於閩州蓬州隆慶府錦  
州普州資州廣安軍創置廣惠倉以備水旱因  
白敏中成都記趙忭成都古今記附益爲成都  
志又命僚屬輯自漢以來詩文之以益而作者  
爲成都文類東塘集十八以賑濟勞加徽猷閣學士  
東塘集六年召爲吏部尚書兼侍讀充崇陵覆  
奏狀東塘集十九按使不三月奉祠東塘集十九嘉泰元年以寶文

閣學士知紹興府本年復爲吏部尚書

會稽志參東塘

集十

九二年同知樞密院事三年除參知政事

宰輔

錄編年

旋以資政殿學士知鎮江府辭提舉洞霄

宮起知潭州改知隆興府力辭加大學士致仕

四年卒於德清年六十五累贈太師魏國公

說友性資闔敏儒術淹通

攻媿集內制

嘗與尤袤楊

萬里陳傅良程大昌范成大樓鑰韓元吉相倡

和

東塘集詩

事兄直友謹直友無一錢食客輒爲萬

錢具費皆出說友

水心集表直友墓誌

淳熙十五年光宗

爲太子說友於議事堂一見就知

東塘集乞過宮表

遂

列從班旋長民部甯宗嗣位連章請外四年在蜀一年在越中更奉祠兩長銓部總十一月東西兩府通及一載自謂度時量力勉強實難觀其辭可以逆其意矣東塘集十九其歿也魏了翁祭之以文推爲耆臣宿弼鶴止集

姜夔傳

姜夔字堯章鄱陽人年少客游蕭德藻識之妻以兄女書錄攜之茗上遂家武康掌故集引癸癸辛雜識無此文惟齊東野語云堯章出處備見張輯宗瑞所作白石小傳掌故集或據小傳誤以爲居與白石洞爲鄰潘德久字之曰白石雜識耳

道人

詩人玉屑

又號石帚

絕妙詞箋

於學無所不通欲正

頌臺樂律

謝采伯續書譜序

著大樂議甯宗時上於朝

奏言紹興大樂多用大晟所造有編鐘鋪鐘景鐘有特磬玉磬編磬三鐘三磬未必相應壎有大小簫篴箏有長短笙竽之簧有厚薄未必能合度琴瑟絃有緩急燥溼軫有旋復柱有進退未必能合調總衆音而言之金欲應石石欲應絲絲欲應竹竹欲應匏匏欲應土而四金之音又欲應黃鐘不知其果應否樂曲知以七律爲一調而未知度曲之義知以一律配一字而未



知永言之旨黃鐘奏而聲或林鐘林鐘奏而聲  
或太簇七音之協四聲各有自然之理今以平  
入配重濁以上去配輕清奏之多不協諧八音  
琴瑟尤難琴必每調而改絃瑟必每調而退柱  
上下相生其理至妙知之者鮮又琴瑟聲微常  
見蔽於鐘磬鼓簫之聲匏竹土聲長而金石常  
不能以相待往往考擊失宜消息未盡至於歌  
詩則一句而鐘四擊一字而竿一吹未協古人  
槁木貫珠之意況樂工於焉占籍擊鐘磬者不  
知聲吹匏竹者不知穴操琴瑟者不知絃同奏

則動手不均迭奏則發聲不屬比者人事不和  
天時多忒由大樂未有以格神人召和氣也宮  
爲君爲父商爲臣爲子宮商和則君臣父子和  
徵爲火羽爲水南方火之位北方水之宅常使  
水聲哀火聲盛則可助南而抑北宮爲夫徵爲  
婦商雖父宮實徵之子常以婦助夫子助母而  
後聲成徵盛則宮倡而有和商盛則徵有子而  
生生不窮休祥不召而自至災害不祓而自消  
聖主方將講禮郊見願詔求知音之士考正太  
常之器取所用樂曲條理五音隲括四聲而使

協和然後品擇樂工其上者教以金石絲竹匏  
土詩歌之事其次者教以夏擊干羽四金之事  
其下不可教者汰之雖古樂未易遽復而追還  
祖宗盛典實在茲舉又自作聖宋鐃鼓曲十四  
篇上於尚書省書奏詔付太常

文獻通考參  
宋史樂志免

解不第

書錄  
解題

夔學詩於蕭德藻琢句精工嘗有

句云夜暗歸雲繞柁牙江涵秋影鴈團沙行人  
悵望蘇臺柳曾與吳王掃落花楊萬里喜誦之  
謂其子長孺曰吾與汝弗如也

鶴林  
玉露詞極精妙

不減清真樂府其高處美成所不及善吹簫自

製曲初則率意爲長短句然後協以音律云

花庵

詞選

范成大居石湖夔載雪詣之止既月范授

簡徵新聲夔製暗香疏影兩曲成大把玩不已

張炎歎爲前無古人後無來者

研北雜志參白石歌曲絕妙詞

箋書法迥脫脂粉一洗塵俗

書史會要

趙子固目爲

書家申韓

研北雜志

考古極精

齊東野語

著白石叢橐白

石道人歌曲絳帖平讀書譜禊帖偏旁考張循

王遺事

書錄解題參齊東野語樓玫瑰集

琴瑟考古圖

慶元會要范

成大以爲翰墨人品均似晉宋之雅士

齊東野語自述

往來杭州卒葬西馬塍

研北雜志

陳存傳

陳存字體仁號本齋龍泉人占安吉州籍舉淳祐七年進士寶祐五年以史館校勘召試除祕書省正字歷祕書著作郎仍兼景獻府教授累遷兵部尚書端明殿大學士知慶元府沿海制置使國亡歸苕以春秋經學教授生徒勞志參括蒼彙記元遣使七徵不起尋遘疾却醫絕食旬有四日卒嘉靖浙江通志趙良淳死國體仁挽之以詩其末章云慷慨君酬國奔逃我喪家陸沈同一壑淵涉渺無涯祈死惟嫌晚餘生只自嗟蒿萊連雉

堞落日噪棲鴉詩凡三章載浩然齋雅談讀其

詩可以想見其人矣

五石山房筆記

敖繼翁傳

敖繼翁

一作公

字君善長樂人寓居湖州築一小

樓冬不爐夏不扇邃於經術規行矩步吳下名

士咸出其門

菰城文獻

趙孟頫師事之平章高顯卿

薦於朝授信州教授命下而卒所著有儀禮集

說明一

統志

顧阿瑛傳

元

顧阿瑛字仲英名德輝崑山人少輕財結客豪

宕自好年三十始折節讀書益購古名畫彝鼎  
築別業於茜涇曰玉山集處日夜與客置酒賦  
詩其中四方文學之士若河東張翥會稽楊維  
禎天台柯九思永嘉李孝光咸主其家風流文  
雅著稱東南嘗舉茂才署會稽教諭辟行省屬  
官皆不就姑蘇志既而以子恩封武略將軍水軍  
千戶飛騎尉錢唐縣男至正十七年奉母陶氏  
避地於吳興東南之商溪瑛卽堂後結樓名曰白雲海  
絕陶氏歿於商溪瑛卽堂後結樓名曰白雲海  
時登焉鄭元祐爲之記

集

僑吳 洪武初隨其子元

臣遷臨濠卒所著詩曰玉山璞橐

姑蘇志



儀顧堂集卷十四終